



松漠記聞下

冷山去燕山三千里去金國所都二百餘里皆  
不毛之地乙卯歲有二龍不辨名色身高丈餘  
相去數步而死冷氣腥熖襲人不可近一已無  
角如截去一額有竅大若當三錢如斧鑿痕悟  
室欲遣人截其角或以爲不祥乃止

戊午夏熙州野外灤水有龍見三日初於水面  
見蒼龍一條良久即沒次日見金龍以爪托一  
嬰兒兒雖爲龍所戲弄略無懼色三日金龍如  
故見一帝者乘白馬紅衫玉帶如少年中官狀



馬前有六蟾蜍凡三時方沒郡人競往觀之相去甚近而無風濤之害熙州嘗以圖示劉豫劉不悅趙伯璘曾見之

是年五月汴都太康縣一夕大雷雨下冰龜巨數十里龜大小不等首足卦文皆具

阿保機居西樓宿氊帳中晨起見黑龍長十餘丈蜿蜒其上引弓射之即騰空夭矯而逝墜于黃龍府之西相去已千五百里纔長數尺其骸尚在金國內庫悟室長子源嘗見之尾鬣支體皆全雙角已爲人所截與予所藏董羽畫出水

陽山顧氏文房

龍絕相似蓋其背上鬣不作魚鬣也

悟室第三子撻撻勁勇有智力兼百人悟室常與之謀國蒲路虎之死撻撻承詔召入自後執其手而殺之爲明威將軍正月十六挾奴僕十輩入寡孀家烝焉悟室在闕下虜都其長子以告命械繫于家悟室至問其故曰放偷敢爾悟室命縛杖其背百餘釋之體無傷虜法縛者必死撻撻始謂必杖聞縛而驚遂失心歸室不能坐呼曰我將去人問之曰適蒲路虎來後旬日死悟室哭之慟曰折我左手是年九月悟室亦



坐誅

已未年五月客星守魯悟室占之太史曰不在  
我分野外方小裁無傷至七月魯充宋滕虞諸  
王同日誅庚申年星守陳太史以告宇文宇文  
語悟室悟室特王悟室不以為怪至九月而誅虜  
亦應天道如此

金人科舉先於諸州分縣赴試詩賦者兼論作  
一日經義者兼論策作三日號為鄉試悉以本  
縣令為試官預試之士唯雜犯者黜榜首曰鄉  
元亦曰解元次年春分三路類試自河以北至

陽山顧氏文房

女真皆就燕關西及河東就雲中河以南就汴  
謂之府試試詩賦論時務策經義則試五道三  
策一論一律義凡二人取一榜首曰府元至秋  
盡集諸路舉人于燕名曰會試凡六人取一榜  
首曰勅頭亦曰狀元分三甲曰上甲中甲下甲  
勅頭補承德郎視中朝之承議上甲皆賜緋七  
年即至奉直大夫謂之正郎第二第三人八年  
或九年中甲十二年下甲十三年不以所居官  
高卑皆遷大夫中下甲服綠例賜銀帶府試差  
官取旨尚書省降劄知舉一人同知二人又有



封彌謄錄監門之類試闈用四柱揭綵其上目  
曰至公樓主文登之以觀試或有私者停官不  
叙仍決沙袋親戚不回避尤重書法凡作字有  
點畫偏旁微誤者皆曰雜犯先是考校畢知舉  
即唱名近歲上中下甲雜取十名納之國中下  
翰林院重考實欲私取權貴也考校時不合格  
者曰榜其名試院欲開餘人方知中選後又置  
御試已  
會試中選者皆當至其國都不復試文只以會  
試榜殿廷唱第而已士人頗以為苦多不願往  
則就燕徑官之  
御試之制遂絕又有明經明法童子科然不擢  
用止於簿尉明經至於為直省官事宰執持筆

陽山顧氏文房

研童子科止有趙憲甫位至三品  
省部有令史以進士及第者為之又由譯史或  
以練事或以關節凡遞勅或除州太守告令史  
譯史送之大州三數百千帥府千緡若兀木諸  
貴人除授則令宰執子弟送之獲數萬緡  
北方苦寒故多衣皮雖得一鼠亦禡皮藏去婦  
以羔皮帽為飾至直十數千敵三大羊之價  
不貴貂鼠以其見日及火則剝落無色也  
初漢兒至曲阜方發宣聖陵粘罕聞之問高慶  
緒渤海人曰孔子何人對曰古之大聖人曰大聖



人墓豈可發皆殺之故闕里得全

燕京茶肆設雙陸局或五或六多至十博者蹴局如南人茶肆中置碁具也

女真多白芍藥花皆野生絕無紅者好事之家采其芽為菜以麪煎之凡待賓齋素則用其味脆美可以久留無生薑至燕方有之每兩價至千二百金人珍甚不肯妄設遇大賓至縷切數絲實碟中以為異品不以雜之飲食中也

西瓜形如匾蒲而圓色極青翠經歲則變黃其味類甜瓜味甘脆中有汁尤冷五代史四夷附

陽山顧氏文房

錄云以牛糞覆棚種之予攜以歸今禁園鄉園皆有亦可留數月但不能經歲仍不變黃色鄱陽有久苦目疾者曝乾服之而愈蓋其性冷故也

長白山在冷山東南千餘里蓋白衣觀音所居其山禽獸皆白人不敢入恐穢其間以致蛇虺之害黑水發源於此舊云粟末河契丹德光破晉改為混同江其俗剝木為舟長可八尺形如梭曰梭船上施一槳止以捕魚至渡車則方舟或三舟後悟室得南人始造船如中國運糧者



多自國都往五國頭城載魚

西樓有蒲瀕水叢生一榦葉如柳長不盈尋丈用以作箭不矯揉而堅左氏所謂董澤之蒲是也

關西羊出同州沙苑大角虬上盤至耳最佳者為卧沙細肋北羊皆長面多髯有角者百無二三大僅如指長不過四寸皆自為白羊其實亦多渾黑亦有肋細如箸者味極珍性畏怯不舐觸不越溝澗善牧者每羣必置殺斃羊數頭殺斃音古力北人仗其勇很行必居前遇水則先涉

陽山顧氏文之二

羣羊皆隨其後以殺斃發風故不食生達鞞者大如驢尾巨而厚類扇自脊至尾或重五斤皆膏脂以為假熊白食餅餌諸國人以它物易之羊順風而行每大風起至舉羣萬計皆失亡牧者馳馬尋逐有至數百里外方得者三月八月兩剪毛當剪時如欲落絮不剪則為草絆落可撚為線春毛不直錢為氈則蠹唯秋毛最佳皮皆用為裘凡宰羊但食其肉貴人享重客間兼皮以進必指而夸曰此潛羊也回鶻豆高二尺許直榦有葉無旁枝角長二寸



每角止兩豆一根才六七角色黃味如栗  
渤海螃螬紅色大如椀螯巨而厚其跪如中國  
螯螯石舉鮐魚之屬皆有之

自上京至燕二千七百五十里上京即西樓也  
三十里至會寧頭鋪四十五里至第二鋪三十  
五里至阿薩鋪四十里至來流河四十里至報  
打孛董鋪七十里至賓州渡混同江七十里至  
北易州五十里至濟州東鋪二十里至濟州四  
十里至勝州鋪五十里至小寺鋪五十里至威  
州四十里至信州北五十里至木阿鋪五十里

陽山顧氏文房

至沒尾鋪五十二里至奚營西四十五里至楊相  
店四十五里至夾道店五十里至安州南鋪四  
十里至宿州北鋪四十里至咸州南鋪四十里  
至銅州南鋪四十里至銀州南鋪五十里至興  
州四十里至蒲河四十里至瀋州六十里至廣  
州七十里至大口六十里至梁漁務三十五里  
至兔兒塌五十里至沙河五十里至顯州五十  
里至軍官寨四十里至惕隱寨四十里至茂州  
四十里至新城四十里至麻吉步落四十里至  
胡家務四十里至童家莊四十里至桃花島四



十里至楊家館五十里至隰州四十里至石家  
店四十里至來州四十里至南新寨四十里至  
千州四十里至潤州三十里至舊榆關三十里  
至新安四十里至雙望店四十里至平州四十  
里至赤峯口四十里至七箇嶺四十里至榛子  
店四十里至永濟務四十里至沙流河四十里  
至玉田縣四十里至羅山鋪三十里至薊州三  
十里至邦軍店三十五里至下店四十里至三  
河縣三十里至潞縣三十里至交亭三十里至  
燕自燕至東京一千三百十五里自東京至泗

陽山顧氏文房

州一千三十四里、自雲中至燕山數百里皆  
下坡其地形極高去天甚近

虜之待中朝使者使副日給細酒二十量罐羊  
肉八斤果子錢五百雜使錢五百白麵三斤油  
半斤醋二升鹽半斤粉一斤細白米三升麵醬  
半斤大柴三束上節細酒六量罐羊肉五斤麵  
三斤雜使錢二百白米二升中節常供酒五量  
罐羊肉三斤麵二斤雜使錢一百白米一升半  
下節常供酒三量罐羊肉二斤麵一斤雜使錢  
一百白米一升半



天眷二年奏請定官制劄子竊以設官分職創  
制立法者乃帝王之能事而不可闕者也在昔  
致治之主靡不皆然及世之衰也侵冒放紛官  
無常守事與言戾實由名喪至於不可復振逮  
聖人之作也剗弊救失乘時變通致治之具然  
後煥然一新九變復貫知言之選其此之謂矣  
太祖皇帝聖武經啓文物度數曾不遑暇太宗  
皇帝嗣位之十二載也威德暢洽萬里同風聰  
明自民不凝於物始下明詔建官正名欲垂範  
於將來以爲民極聖謨弘遠可舉而行克成厥

陽山顧氏文房

終正在今日伏惟皇帝陛下上性孝德欽奉先  
猷爰命有司用精詳訂臣等謹按當唐之治朝  
品位爵秩考覈選舉其法號爲精密尚慮拘牽  
故遠自開元所記降及遼 宋之傳參用講求  
有便於今者不必泥古取正於法者亦無徇習  
今先定到官號品次職守上進御府以塵乙覽  
恭俟聖斷曲加是正言順事成名賓實舉興化  
阜民於是乎在凡新書未載並乞姑仍舊貫涂  
用討論繼此奏請臣等顧惟虛薄講究不能及  
遠以塞明命是懼償涓埃有取伏乞先次頒降



施行答詔曰朕聞可則循否則革事不憚於改  
爲言之易成之難改或譏於欲速審以後舉示  
將不刊爰自先皇已頒明命順攷古道作新斯  
人欲端本於朝廷首建官於臺省豈止百司之  
職守必也正名是將一代之典章無乎不在能  
事未畢眇躬嗣承懼墜先猷惕增夕厲勉圖繼  
述申命講求雖曰法唐宜後先之一揆至於因  
夏固損益之殊途務折衷以適時肆於今而累  
歲庶同乃繹僅至有成掇所先行用敷衆聽作  
室肯太上御名弟遵底法之良若網在綱庶弭有條

陽山顧氏文房

之紊自餘款備繼此施陳已革乃乎行取四時  
之信所由適治揭爲萬世之常凡在見聞共思  
遵守翰林學士韓昉撰詔書曰皇祖有訓非繼  
體者所敢忘聖人無心每立事於不得已朕丕  
承洪緒一紀於茲祇適先猷百爲不越故在朝  
廷之上其猶草昧之初比以大臣力陳懇奏謂  
綱紀以未舉在國家之何觀且名可言而言可  
行所由集事蓋變則通而通則久故用裕民宜  
法古官以開政府正號以責實效著儀而辨等  
威天有雷風辭命安得不作人皆頽閱印符然



後可捐凡此數條皆今急務禮樂之備源流在  
茲祈以必行斷宜有定仰惟先帝亦鑒微衷神  
豈可誣方在天而對越時由異偶若易地則皆  
然是用載惟殆非相反何必改作蓋嘗三復於  
斯言皆曰可行庶將一變而至道乃從所議用  
創新規維茲故土之風頗尚先民之質性成於  
習遽易為難政有所因姑宜仍舊漸祈胥效翕  
致大同凡在邇遐當體朕意其所改創事件宜  
令尚書省就便從宜施行

宋究諸王之誅韓昉作詔曰周行管叔之誅漢

明山顧氏文房

致燕王之辟茲維無赦古不為非豈親親之道  
有所未字犯廟諱以惡惡之心是不可忍朕自惟冲  
昧猥嗣統臨蓋由文烈之公欲大武元之後德  
雖為否義亦當然不圖骨肉之間有懷逢蠱蠱之  
毒皇伯太師宋國王宗磐族聯諸父位冠三師  
始朕承祧乃緊協力肆登極品兼綰劇權何為  
失圖以底不類謂為先帝之元子常蓄無君之  
禍心昵信宵人煽為姦黨坐圖問鼎行將美兵  
皇叔太傅領三省事究國王宗雋為國至親與  
朕同體內懷悖德外縱虛驕肆已之怒專殺以



取威擅公之財市恩而惑衆力擯勲舊欲孤朝  
廷即其所踈濟以同惡皇叔虞王宗英滕王宗  
偉殿前左副點檢渾觀會寧少尹胡實刺郎君  
石家奴千戶述离古楚等競爲禍始舉好亂從  
逞躁欲以無厭助逆謀之妄作意所非冀獲其  
必成先將賊其大臣次欲危其宗廟造端累歲  
舉事有期早露端倪每存舍覆第嚴禁衛載肅  
禮文庶見君親之威少安臣子之分蔑然不顧  
狂甚自如尚賴神明之靈克開社稷之福日者  
叛人吳十稔心稱亂授首底亡爰致克奔之徒

陽山顧氏文房

乃窮相與之黨得厥情狀乎於見聞皆由左驗  
以質成莫敢詭辭而抵調欲申三宥公議豈容  
不頓一兵羣克悉殄於今月三日已各伏辜并  
令有司除屬籍訖自餘註誤更不躡尋庶示寬  
容用安反側民畫衣而有犯古猶欽哉予素服  
以如喪情可知也

陳王悟室加恩制詞曰貴貴尊賢式重儀刑之  
望親親尚齒亦優宗族之恩朕俯迫羣情祗膺  
顯號爰第景風之賞孰居台曜之先凡爾在廷  
聽予作命具官屬爲諸父身相累朝蹈五常九



德之規爲四輔三公之冠當艱難創業之際藉  
左右宅師之勤如獻兆之信著龜如濟川之待  
舟楫迪我高后格于皇天屬正統之有歸賴嘉  
謀之先定緝熙百度董正六官雍容以折肘腋  
之姦指顧以定朔南之地德業並茂古今罕倫  
迨茲慶賜之頒詢及僉諧之論謂上公之加命  
有九而天下之達尊者三旣已兼全無可增益  
乃敷求於載籍仍自斷於朕心杖以造朝前已  
加於異數坐而論道今復舉於舊章蕭相國賜  
詔不名安平王肩輿升殿併茲優渥以獎耆英

陽山顧氏文口

於戲建無窮之基則必享無窮之福錫非常之  
禮所以報非常之功欽承體貌之隆共對邦家  
之祉

皇后裴摩申氏謝表曰龍衮珠旒端臨雲陛玉  
書金璽榮畀椒房恭受以還凌兢罔措恭惟道  
兼天覆明並日升誠意正心基周王之風化制  
禮作樂煥堯帝之文章俯矜奉事之勞飭遣光  
華之使温言獎飾美號重仍顧拜命之甚優慙  
省躬而莫稱謹當恪遵睿訓益勵肅心庶幾婦  
道之修仰助人文之化

后父小名胡搭



渤海賀正表曰三陽應律載肇於歲華萬壽稱  
觴欣逢於元會恭惟受天之祐如日之升布治  
惟新順夏時而謹始卜年方未邁周歷以垂休  
臣幸際明昌良深抃頌遠馳信幣用申祝聖之  
誠仰冀清躬茂集履端之慶

夏國賀正表曰斗柄建寅當帝曆更新之旦葭  
灰飛管屬皇圖正始之辰四序推先一人履慶  
恭惟化流中外德視邇遐方熙律之載陽應令  
候而布惠克凝神於突奧務行政於要荒四表  
無虞羣黎至治爰鳳闕屆春之早協龍廷展賀

陽山顯氏文房

之初百辟稱觴用盡輸誠之意萬邦薦祉克堅  
獻歲之心臣無任云云大使武功郎沒細好德  
副使宣德郎李膺等齎表詣闕以聞

高麗賀正表曰帝出乎震方當遂三陽之生王  
次於春所以大一統之始覆幬之內歡慶皆均  
恭惟中孚應天大有得位所過者化閱衆甫以  
常新不怒而威觀庶邦之率服茂對佳辰之復  
備膺諸福之休臣幸<sup>太上御名</sup>昌期遠居外服上千  
萬歲壽曾莫預於臚傳同億兆人心但竊深於  
善祝云云使朝散大夫衛尉少卿輕車都尉賜



紫金魚袋李仲衍奉表稱賀以聞

松漠記聞下

陽山顧氏文房

右松漠記聞二卷

先君銜使十五年深隄窮漠耳目所接隨  
筆纂錄聞孟公庚發篋汴都危變歸計創  
艾而火其書禿節來歸因語言得罪柄臣  
諸子佩三緘之戒循咳侍鄰不敢以北方  
事置齒牙間及南徙炎荒視膳餘日稍亦  
談及遠事凡不涉今日強弱利害者因操  
牘記其一二未幾復有私史之禁  
先君亦枕末疾遂廢不錄及柄臣蓋棺弛  
語言之律而



先君已齎恨泉下鳩拾殘藁庶得數十事  
反袂拭面著為一編紹興丙子夏長男适  
謹書

陽山顧氏文房

松漠補遺

虜中廟諱尤嚴不許人犯嘗有一武弁經西元  
帥投牒誤斥其諱杖背流遞武元初只諱旻後  
有申請云旻閔也遂併閔諱之

虜中中丞唯掌訟牒若斷獄會法或春山秋水

謂去國數百里從駕在外衛兵物故則掌其骸

骼至國則歸其家諫官並以他官兼之與臺官

皆備真不彈擊外道雖有漕使亦不刺舉故官

吏贓穢賂無所憚

虜法文武官不以高下凡丁家難未滿百日皆



差監關稅州商稅院鹽鐵場一年為任謂之優  
饒其稅課倍增者謂之得籌每二籌轉一官有  
歲中八九遷者近有止法不得過三官富者擇  
課額少處受之或以家財貼納只圖遷轉其不  
欲遷者於課利多處除歲額外公然分之

虜中有負犯者不責降只差監鹽場課額雖登  
出賣甚遲雖任滿去官非賣盡不得仕至有十  
年不調者無磨勘之法每一任轉一官以二十  
五月為任詩蒲即改除並不待闕

北地漢兒張獻甫作太原都軍也都監其姊夫劉

山觀氏文房

思與侍郎高慶裔為十友之數張有一犀帶  
國初錢王所獻者號鎮國寶帶是正透中間龍  
形

契丹重骨吐犀犀不大萬株犀無一不曾作帶  
紋如象牙帶黃色止是作刀把已為無價天祚  
以此作兔鶻中國謂之插垂頭者

鹿頂合燕以北者方可車頂是未解角之前才  
解角血脉通冬至方解頂之上為合正頂亦作  
合好者有人字不好者成八字有髓眼不實北  
人謂角為鹿角合頂為鹿頂合南中止有南鹿



不實定有髓眼不可車北地角未老不至秋時不中

麋角與鹿角不同麋角如駝骨通身可車却無紋生枝不比鹿皆小鹿頂骨有紋上下無之亦可熏成紋

犀有三種重透外黑有一暈白中又黑世艱得之正透又曰通犀倒透亦曰花犀或班犀有游魚形諸犀中水犀最貴秀州周通直家有一正透犀帶其中一點白以紙

燈近之即時滅有濕氣疑是水犀耀段褐色涇段白色生絲為經羊毛為緯好而

陽山顧氏文房

不耐豐段有白有褐最佳馳毛段出河西有褐有白

秋毛最佳不蛀冬間毛落去毛上之鹿者取其茸毛皆關西羊為之蕃語謂之羯勒北羊止作鹿毛

松漠補遺



先忠宣松漠記聞伯兄鏤板歛越遵來守  
建鄴又刻之暇日廋閱故牘得北方十有  
一事皆曩歲侍傍親聞之者目曰補遺附  
載於此乾道九年六月二日第二男資政  
殿大學士左中大夫知建康府江南東路  
安撫使兼行宮留守遵謹書

長洲顧氏家藏宋板校行

陽山顧氏文房

漢武帝別國洞冥記序

東漢光祿大夫郭憲撰

憲家世述道書推求先聖往賢之所撰集不可  
窮盡千室不能藏萬乘不能載猶有漏逸或言  
浮誕非政教所同經文史官記事故略而不取  
蓋偏國殊方並不在錄愚謂古曩餘事不可得  
而棄況漢武帝明俊特異之主東方朔因滑稽  
浮誕以匡諫洞心於道教使冥迹之奧昭然顯  
著今籍舊史之所不載者聊以聞見撰洞冥記  
四卷成一家之書庶明博君子該而異焉武帝



以欲窮神仙之事故絕域遐方貢其珍異奇物  
及道術之人故於漢世盛於群主也故編次之  
云爾

漢武帝別國洞冥記卷第一

東漢光祿大夫郭憲撰

漢武帝未誕之時景帝夢一赤彘從雲中直下  
入崇蘭閣帝覺而坐於閣上果見赤氣如煙霧  
來蔽戶牖望上有丹霞翳鬱而起乃改崇蘭閣  
為猗蘭殿後王夫人誕武帝於此殿有青雀群  
飛於霸城門乃改為青雀門乃更修飾刻木為  
綺撩雀去因名青綺門

東方朔字曼倩父張夷字少平妻田氏女夷年  
二百歲顏如童子朔生三日而田氏死時景帝



三年也鄰母拾而養之年三歲天下祕識一覽  
閤誦於口常指撫天下空中獨語鄰母忽失朔  
累月方歸母笞之後復去經年乃歸母忽見大  
驚曰汝行經年一歸何以慰我耶朔曰兒至紫  
泥海有紫水汚衣仍過虞淵湔浣朝發中返何  
云經年乎母問之汝悉是何處行朔曰兒湔衣  
竟暫息都崇堂王公飴之以丹霞漿兒食之太  
飽悶幾死乃飲玄天黃露半合即醒既而還路  
遇一蒼虎息於路傍兒騎虎還打捶過痛虎齧  
兒脚傷母悲嗟乃裂青布裳裹之朔復去家萬

里見一枯樹脫布掛於樹布化爲龍因名其地  
爲布龍澤朔以元封中遊濛鴻之澤忽見王母  
採桑於白海之濱俄有黃翁指阿母以告朔曰  
昔爲吾妻託形爲太白之精今汝此星精也吾  
却食吞氣已九千餘歲目中瞳子色皆青光能  
見幽隱之物三千歲一反骨洗髓二千歲一刻  
肉伐毛自吾生已三洗髓五代毛矣

建元二年帝起騰光臺以望四遠於臺上撞碧  
玉之鐘掛懸黎之磬吹霜條之篴唱來雲依日  
之曲方朔再拜於帝前由臣東遊萬林之野獲



九色鳳雛涿源丹獺之水赤色西過洞壑得滄淵虬子靜海遊珠洞壑在虞淵西虬泉池在五柞宮北中有追雲舟起風舟侍仙舟含煙舟或以杪棠爲柁楫或以木蘭文柁爲櫓棹又起五層臺於月下

釣影山去昭河三萬里有雲氣望之如山影丹藿生於影中葉浮水上有紫河萬里深十丈中有寒荷霜下方香盛有降靈壇養靈池分光殿五間奔雷室七間望蟾閣十二丈土有金鏡廣四尺元封中有祇國獻此鏡照見魍魎不獲隱

形

都夷香如棗核食一片則歷月不飢以粒如粟米許投水中俄而滿大盂也

甘泉宮南昆明池中有靈波殿七間皆以桂爲柱風來自香帝旣耽於靈恠常得卅豹之髓白鳳之骨磨青錫爲屑以蘇油和之照於神壇夜暴雨光不滅有霜蛾如蜂赴火侍者舉麟鬚拂拂之

元光中帝起壽靈壇壇上列植垂龍之木似青梧高十丈有朱露色如丹汁灑其葉地皆成珠



其枝似龍之倒垂亦曰珍枝樹此壇高八丈帝使董謁乘雲霞之輦以昇壇至夜三更聞野鷄鳴忽如曙西王母駕玄鸞歌春歸樂謁乃聞三母歌聲而不見其形歌聲遶梁三匝乃止壇傍草樹枝葉或翻或動歌之感也四面列種軟棗條如青桂風至自拂堦上游塵

董謁字仲玄武都郁邑人也少好學嘗遊山澤負挾圖書患其繁重家貧拾樹葉以代書簡言其易卷懷也編荆為牀聚鳥獸毛以寢其上波祗國亦名波弋國獻神精香草亦名荃靡亦

名春蕪一根百條其間如竹節柔軟其皮如絃可為布所謂春蕪布亦名香荃布堅密如紵冰也握一片滿室皆香婦人帶之彌有芬馥

翁韓國獻飛骸獸狀如鹿青色以寒青之絲為繩繫之及死帝惜之而不瘞掛於苑門皮毛皆爛朽惟骨色猶青時人咸知其神異更以繩繫其足往視之唯見所繫處存而頭尾及骨皆飛去

旦露池西有靈池方四百步有連錢荇浮根菱倒枝藻連錢荇如錢文浮根菱根出水上葉



沉波下質細薄皮甘香葉半青半白霜降彌美  
因名青冰菱也倒枝藻者枝橫倒水中長九尺  
餘如結網有野鴨秋鳧及鷗鷺來翔水上入此  
草中皆不得出如繒網也亦名水網藻中有轉  
羽舫逐龍舫凌波舫帝嘗遊宴於此

漢武帝別國洞冥記卷第一

漢武帝別國洞冥記卷第二

東漢光祿大夫郭憲撰

憲撰

元鼎元年起招仙閣於甘泉宮西編翠羽麟毫  
爲簾青瑠璃爲翳懸黎火齊爲床其上懸浮金  
輕王之磬浮金者色如金自浮於水上輕王者  
其實貞明而輕有霞光繡有藻龍繡有連烟繡  
有走龍錦有雲鳳錦翻鴻錦閣上燒金靡香屑  
燒粟許其氣三月不絕進崑崙細棗出崑崙山  
山臨碧海上萬年一實如今之軟棗咋之有膏  
膏可燃燈西王母握以獻帝燃芳苾燈光色紫



有白鳳黑龍馬昇足來戲於閣邊有青鳥赤頭道  
路而下以迎神女神女留玉釵以贈帝帝以賜  
趙婕妤至昭帝元鳳中宮人猶見此釵黃誦欲  
之明日示之既發匣有白鷲飛昇天後宮人學  
作此釵因名玉鷲釵言吉祥也

元鼎五年鄧支國貢馬肝石百斤常以水銀養  
之內玉櫃中金泥封其上國人長四尺惟餌此  
石而已半青半白如今之馬肝春碎以和九轉  
之丹服之彌年不饑渴也以之拂髮白者皆黑  
帝坐羣臣於甘泉殿有髮白者以石拂之應手

皆黑是時公卿語曰不用作方伯惟須馬肝石  
此石酷烈不和丹砂不可近髮帝寢靈莊殿召  
東方朔於青綺窓不隔締紉重幕問朔曰漢承  
庚運火德以何精瑞爲祥應朔跪而對曰臣常  
至吳明之墟是長安東過扶桑七萬里有及雲  
山山頂有井雲起井中若上德王黃雲出火德  
王赤雲出水德王黑雲出金德王白雲出木德  
王青雲出此皆應瑞德也帝曰善

元封中起方山像招諸靈異召東方朔言其祕  
奧乃燒天下異香有沉光香精祇香明庭香金



磳香塗菟香外國所貢青檀之燈青檀木有膏  
如淳漆削置器中以臘和之塗布燃照數里  
起神明臺上有九天道金牀象席虎珀鎮雜玉  
爲簾帝坐良久設甜水之冰以備洪濯酌瑤琨  
碧酒炮青豹之脯果則有塗陰紫梨琳國碧李  
仙衆與食之

吠勒國貢文犀四頭狀如水兕角表有光因名  
明犀置暗中有光影亦曰影犀織以爲簾如錦  
綺之文此國去長安九千里在日南人長七尺  
被髮至踵乘犀象之車乘象入海底取寶宿於

蛟人之舍得淚珠則蛟所泣之珠也亦曰泣珠  
甜水去虞淵八十里有甜溪水味如蜜東方朔  
遊此水得數斛以獻帝投水於井井水常甜而  
寒洗沐則肌理柔滑

瑤琨去玉門九萬里有碧草如麥割之以釀酒  
則味如醇酎飲一合三旬不醒但飲甜水隨飲  
而醒

塗山之背梨大如升或云斗紫色千年一花亦  
白紫輕梨

琳國去長安九千里生玉葉李色如碧玉數十



年一熟味酸昔韓終常餌此李因名韓終李  
元封三年大秦國貢花蹄牛其色皎高六尺尾  
環繞其身角端有肉蹄如蓮花善走多力帝使  
輦銅石以起望仙宮跡在石上皆如花形故陽  
關之外花牛津時得異石長十丈高三丈立於  
望仙宮因名龍鍾石武帝末此石自陷入地唯  
尾出土上今人謂龍尾塚也

帝好微行於長安城西夜見一螭遊於路董謁  
曰昔桀媚末喜於膝上以金簪貫玉螭腹爲戲  
今螭腹餘金簪穿痕安非此耶曰白龍魚鱗網

者食之帝曰試我也

元封四年脩彌國獻駁騾高十尺毛色赤斑皆  
有日月之象帝以金珽爲鑲絆以寶器盛藟以  
飼之

元封五年勒畢國貢細鳥以方尺之玉籠盛數  
百頭形如大蠅狀似鸚鵡聲聞數里之間如黃  
鵠之音也國人常以此鳥候時亦名曰候日蟲  
帝置之於宮內前日而飛盡帝惜求之不復得  
明年見細鳥集帷幕或入衣袖因名蟬宮內嬪  
妃皆悅之有鳥集其衣者輒蒙愛幸至武帝末



稍稍自死人猶愛其皮服其皮者多爲丈夫所媚  
勒畢國人長三寸有翼善言語戲笑因名善語  
國常羣飛往日下自曝身熱乃歸飲丹露爲漿  
丹露者日初出有露汁如珠也

太初二年東方朔從西那汗國歸得聲風木十  
枝獻帝長九尺大如指此木臨因桓之水則禹  
貢所謂因桓是也其源出甜波樹上有紫鷲黃  
鵠集其間實如油麻風吹枝如玉聲因以爲名  
帝以枝遍賜尊臣臣有凶者枝則汗臣有死者

枝則折昔老聃在於周世年七百歲枝竟未汗  
偃佺生於堯時年三千歲枝竟未一折帝乃以  
枝問朔朔曰臣已見此枝三過枯死而復生豈  
汗折而已哉里語曰年未半枝不汗此木五千  
年一濕萬歲不枯

太初三年起甘泉望風臺臺上得白珠如花一  
枝帝以錦蓋覆之如照月矣因名照明珠以賜  
董偃盛以琉璃之筐

太初四年東方朔從支提國來國人長三丈二  
尺三手三足各三指多力善走國內小山能移



之有澗泉飲能盡結海苔為衣其戲笑取犀象相投擲為樂

東方朔遊吉雲之地得神馬一疋高九尺帝問朔是何獸也朔曰昔西王母乘靈光輦以適東王公之舍稅此馬遊於芝田乃食芝田之草東王公怒弃馬於清津天岸臣至王公之壇因騎馬返繞日三匝然入漢關關猶未掩臣於馬上睡不覺而至帝曰其名云何對曰因疾為名步景朔當乘之時如駑蹇之驢耳東方朔曰臣有吉雲草十頃種於九景山東二千歲一花明年

應生臣走請刈之得以秣馬馬終不饑也朔曰臣至東極過吉雲之澤多生此草移於九景之山全不如吉雲之地帝曰何謂吉雲朔曰其國俗以雲氣占吉凶若樂事則滿室雲起五色照人著於草樹皆成五色靈珠甚甘帝曰吉雲露可得乎朔乃東走至夕而返得玄露青露盛青琉璃各受五合跪以獻帝遍賜羣臣羣臣得嘗者老者皆少疾者皆愈凡五官嘗露董謁李充孟岐郭瓊黃安也

李充馮翊人也自言三百歲荷草畚負五岳真



圖而至帝禮待之亦號負圖先生也

孟岐河清之逸人也年可七百歲語及周初事了然如目前岐侍周公昇壇上岐以手摩成王足周公以玉笏與之岐嘗寶執每以衣袂拂拭笏厚七分今銳斷恒切桂葉食之聞帝好仙披草蓋而來謁帝焉

郭瓊東郡人也形貌醜劣而意度過人曾宿人家輒乞薪自照讀書晝眠眼不閉行地無迹帝聞其異徵焉

黃安代郡人也爲代郡卒自云卑猥不獲處人

間執鞭懷荆而讀書畫地以記數者夕地成池矣時人謂黃安年可八十餘視如童子常服朱砂舉體皆赤冬不着裘坐一神龜廣二尺人問子坐此龜幾年矣對曰昔伏羲始造網罟獲此龜以授吾吾坐龜背已平矣此龜畏日月之光二千歲即一出頭吾坐此龜已見五出頭矣行即負龜以趨世人謂黃安萬歲矣



漢武帝別國洞冥記卷第三

東漢光祿大夫郭憲撰

天漢二年帝昇蒼龍閣思仙術召諸方士言遠國遐方之事唯東方朔下席操筆跪而進帝曰大夫爲朕言乎朔曰臣遊北極至鍾火之山日月所不照有青龍嚼燭火以照山之四極亦有園圃池苑皆植異木異草有明莖草夜如金燈折枝爲炬照見鬼物之形仙人竄封常服此草於夜瞑時輒見腹光通外亦名洞冥草帝令剉此草爲泥以塗雲明之館夜坐此館不加燈燭



亦名照魅草採以藉足履水不沉

有夢草似蒲色紅晝縮入地夜則出亦名懷莫  
懷其葉則知夢之吉凶立驗也帝思李夫人之  
容不可得朔乃獻一枝帝懷之夜果夢夫人因  
改曰懷夢草

有鳳葵草色丹葉長四寸味甘久食令人身輕  
肌滑赤松子餌之三歲乘黃蛇入水得黃珠一  
枚色如真金或言是黃蛇之卵故名蛇珠亦曰  
銷疾珠語曰寧失千里駒不失黃蛇珠  
有五味草初生味甘花時味酸食之使人不眠

名曰却睡草末多國獻此草此國人長四寸織  
麟毛為布以文石為牀人形雖小而屋宇崇曠  
織鳳毛錦以錦為帷幕也

烏哀國有龍爪薤長九尺色如玉煎之有膏以  
和紫桂為丸服一粒千歲不饑故語曰薤和膏  
身生毛

有掌中芥葉如松子取其子置掌中吹之而生  
一吹長一尺至三尺而止然後可移於地上若  
不經掌中吹者則不生也食之能空中孤立足  
不躡地亦名躡空草



帝常見彗星東方朔折指星之木以授帝帝以木指彗星星尋則沒也星出之夜野獸皆鳴別說謂之獸鳴星

有紫柰大如斗甜如蜜核紫花青研之有汁如漆可染衣其汁着衣不可滌浣亦名閻衣柰有龍肝瓜長一尺花紅葉素生於冰谷所謂冰谷素葉之瓜仙人瑕丘仲採藥得此瓜食之千歲不渴瓜上恒如霜雪刮嘗如蜜滓及帝封泰山從者皆賜冰谷素葉之瓜帝解鳴鴻之刀以賜朔刀長三尺朔曰此刀黃帝採首山之金鑄

之雄已飛去雌者猶存帝臨崩舉刀以示朔恐人得此刀欲銷之刀於手中化爲鵲赤色飛去雲中

有鵲啣火於清溪之上鵲化成龍

西域獻虎龍高七尺映日看之光如聚炬火有童子遙見有黃鵠白首鼓翅於帝前即方朔着黃綾單衣頭已斑白漢朝皆異其神化而不測其年矣

善苑國嘗貢一蟹長九尺有百足四螯因名百足蟹煮其殼勝於黃膠亦謂之螯膠勝於鳳喙



之膠也

帝常夕望東邊有青雲起俄而見雙白鶴集臺之上倏忽變爲二神女舞於臺握鳳管之簫撫落霞之琴歌青吳春波之曲帝舒閣海玄落之席散明天發日之香香出胥池寒國地有發日樹言日從雲出雲來掩日風吹樹枝拂雲開日光也亦名開日樹樹有汁滴如松脂也

有玄都翠水水中有菱碧色狀如雞飛亦名翔雞菱仙人鳧伯子常遊翠水之涯採菱而食之令骨輕兼身生毛羽也

有遠飛雞夕則還依人曉則絕飛四海朝往夕還常啣桂枝之實歸於南山或落地而生高七八尺衆仙竒愛之釀以釀酒名曰桂醪嘗一滴舉體如金色陸通嘗餌黃桂之酒祝雞公善養雞得遠飛雞之卯伏之名曰翻明雞如鵠大色紫有翼翼下有目亦曰目羽雞

帝於望鵠臺西起清月臺臺下穿池廣千尺登臺以眺月影入池中使仙人乘舟弄月影因名影娥池亦曰眺蟾臺酌雲蘆酒蘆以玄草黑蕨金蒲甜蓼果以青櫻龍瓜白芋紫莖寒蕨地花



氣葛此葛於地下生花入地十丈乃得此葛其根倒出亦名金虎鬚草因名紫鬚葛也

影娥池中有遊月船觸月船鴻毛船遠見船載數百人或以青桂之枝爲棹或以木蘭之心爲檝練實之竹爲篙紉石脉之爲繩纜也石脉出晡東國細如絲可繩萬斤生石裏破石而後得此脉縈緒如麻紵也名曰石麻亦可爲布也

影娥池中有鼈龜望其羣出岸上如連璧弄於沙岸也故語曰夜未央待龜黃

影娥池北作鳴禽之苑有生金樹破之皮間有

屑如金而色青亦名青金樹

有司夜雞隨鼓節而鳴不息從夜至曉一更爲一聲五更爲五聲亦曰五時雞

有喜日鵝至日出時銜翅而舞又名曰舞日鵝有升渠鴨赤色每止於芙蓉上不食五穀唯啣葉上垂露因名垂露鴨亦曰丹毛鳧

有女香樹細枝葉婦人帶之香終年不減



漢武帝別國洞冥記卷第四

東漢光祿大夫郭憲撰

武帝暮年彌好仙術與東方朔狎暱帝曰朕所好甚者不老其可得乎朔曰臣能使少者不老帝曰服何藥耶朔曰東北有地日之草西南有春生之魚帝曰何以知之朔曰三足鳥數下地食此草羲和欲馭以手揜鳥目不聽下也長其食此草蓋鳥獸食此草則美悶不能動矣帝曰子何以知乎朔曰臣小時掘井陷落地下數十年無所託寄有人引臣欲往此草中隔紅泉不



得渡其人以一隻筏與臣臣泛紅泉得至此草  
之處臣採而食之其國人皆織珠玉爲業邀臣  
入雲端之幕設玄珉雕枕刻黑玉銅鏤爲日月  
雲雷之狀亦曰縷雲枕又薦蛟毫之白縹以蛟  
毫織爲縹也此毫柔而冷常以夏日舒之因名  
柔毫縹又有水藻之屏臣舉手拭之恐水流濕  
其席乃其光也

帝所幸宮人名麗娟年十四玉膚柔軟吹氣勝  
蘭不欲衣纓拂之恐體痕也每歌李延年和之  
於芝生殿唱迴風之曲庭中花皆翻落置麗娟

於明離之帳恐塵垢污其體也帝常以衣帶繫  
麗娟之袂閉於重幕之中恐隨風而去也麗娟  
以琥珀爲佩置衣裾裏不使人知乃言骨節自  
鳴相與爲神恠也

有丹蝦長十丈鬚長八尺有兩翅其鼻如鋸載  
紫桂之林以鬚纏身急流以爲栖息之處馬丹  
嘗折蝦鬚爲杖後弃杖而飛鬚化爲丹亦在海  
傍

帝昇望月臺時瞑望南端有三青鴨羣飛俄而  
止於臺上帝悅之至夕鴨宿於臺端日色已暗



帝求海肺之膏以爲燈焉取靈瀟布爲纏火光甚微而光色無幽不入青鴨化爲三小童皆着青綺文縐各握鯨文大錢五枚置帝几前身止影動因名輕影錢

元封三年鄴過國獻能言龜一頭長一尺二寸盛以青玉匣廣一尺九寸匣上豁一孔以通氣東方朔曰唯承桂露以飲之置於通風之臺上欲往卜命朔而問焉言無不中

唯有一女人愛悅於帝名曰巨靈帝傍有青珉唾壺巨靈乍出入其中或戲笑帝前東方朔望見巨靈乃目之巨靈因而飛去望見化成青雀因其飛去帝乃起青雀臺時見青雀來則不見巨靈也

漢武帝別國洞冥記卷第四



西



